



YELOD 27^{id}

NÜM: 09

SETUL 2017

Pads: 81 jü 88

O Volapükaflens valöpo!

Pro mens mödik, kels löfons ad bejäfön pükis, binos yof vemik ad tradutön vödemis se pük bal ini pük votik, balido ad tüvön, vio kanoy notodön saido kuratiko e suemoviko siämis, e telido ad juitön fredı, üf sperimänt at eplöpon. Tradut kösömiko ye läs fasilon, kas neno-lans ömna jinons cedön. Tradutoy siämi vödema, no vödis ona. Atos mögon te, if büo löliko isuemoy vödemi rigik.

Votaflano, ven reidoy bosı in natapük oya, mödadilo suem kuratik vöda alik no zesüdon, bi tikodayumät e büsev valemik oya saidons ad juitön vödemi. Kod atosa binon, das vöds jenöfo kösömiko no labons sinifi kuratik te bali, ab züädi sinifas plu u läs sümikas. Zuo vöds in püks valik pagebons in metafors. Dido kanoy konstatön, das suemods nedabinotik tio valiks ädavedons se metafors. El Albert Sleumer ettimo äpenom: "*Bi mens vo natälo no äbinons nolavans, primo suemods ti valiks te ätefons lifi balugik sa jafidi nulüdotas onik.*" (in "Pük menik", 1938).

Fe datuval äpenom in 'Volapük, die Weltsprache', 1880, das sue-mods valik Volapüka sötöns mögiküno binön kleiliks e netelpläno-viks, ed atos ömna älabon as sek, das Volapük demütön tu-kurati, kel voiko no zesüdon ed igo fikulükon gebi püka obsik.

In püks anik – as sams: Linglänapük e sperant – vöds suvo kanons pagebön me sinifs vemo valemiks e metaforiks, e kluo püks "dälälik" somik mödadilo binons telplänovikums ka püks votik – as sams: Deutänapük, Volapük ed el 'Ido' –, kels binons "sevärikum" tefü geb vödas okik e flagons mediti e pükakurati pluiki.

Kludo, ven tradutoy vödemis se pük klada balid (dälälikum) ini pük klada telid (sevärikum), mutoy prüdön. Ai mutoy vätälön sinifi kuratik vödas u notodotas demü tikodayumät tefik e täno steifön ad tüvön vödis u notodotis pötöfikis. Klülos, das atos baibinon tefü tradut alik, ab püks ömik binons säkädikums ka votiks.

Vipobs reidanes hitüpadelis lätik jönik!

HPL-L-RKS

AYEL EBLINON VOLAPÜKE YUBIDI

fa vicifal: 'Daniil Morozof'



Tü del zülid gustula bü yels: 130 kadäm balid Volapüka pästiton. Atos äjenon pö Volapükakongred valemik telid in zif Ba-yäna: 'München' tö 'Löwenbräu-Keller': bi-ribötädöp benosevädik pö el 'Stiglmaier-platz'.

Primo kadäm äbinädon me limans sököl:

Johann Martin Schleyer

(datuval ä cifal; ba dilekal)

Auguste Kerckhoffs *(dilekan, Fransän)*

Julius Fieweger *(Deutän)*

Rudolf Herold *(Deutän)*

Rupert Kniele *(Deutän)*

Heinrich Schnepfer *(Deutän)*

Karl Dornbusch *(Linglän)*

Joseph Holden *(Linglän)*

Angelo Ferretti *(Litaliyän)*

T. C. Winkler *(Nedän)*

Georg Bánfy *(Lösterän-Macarän)*

Moritz Obhlidal *(Lösterän-Macarän)*

Alfons von Rylski *(Lösterän-Macarän)*

José da Silva Teixeira *(Portugän)*

Waldemar Rosenberger *(Rusän)*

August Nilson *(Svedän-Norgän)*

(bo cäl oma no päzepon)

Charles E. Sprague *(Lamerikän)*

Francisco Fernandez Iparraguirre

(Spanyän)

Joseph Bernhaupt *(Siyop)*

Kadäm et äbüojonidon ad yufön datuvali pö menod Volapüka, ab liedo kadämans ettimik äprimons pianiko ad vobädön yufapüki nulik nes demön cedi cifala balid (samo tidabuk sevädik yela: 1889 fa jiels 'Enderneitt' e 'Korovina' pro Rusänapükans änunon, das kadäm Volapüka ifinidon tonati: x). Sekü atos päsäcälons fa hiel 'Schleyer'. Ye äneküpons igo säcäli okas e takediko äbleibons ceinön Volapüki ad el 'Idiom Neutral', kel no plu äsümon ad Volapük.

Lätikumo el 'Schleyer' ädavedükom kadämi nulik labü limans kol ok ädivodöls (ba kanoy nemön oni kadämi telid). In el "Jenotem brefik Volapüka" nems anik pemäniotons, sevabo: els 'Rupert Kniele, Bernhaupt, Barazia, Plocek, Scherzinger, Foulques'. Ün yel: 1900 Volapükakadäm telidnaedo pädonunoganükon fa el 'Schleyer'. Famülanems anik kadämanas ettimik pemäniotons in el "Volapükagased pro Nedänapükans": els 'Zetter, Pinth, Zamponi, Colling, Kausch, Ludwig, Moll van Santbergen, Scherzinger, Gsell, Reyn- ders, Sleumer, Basilescu, A. de Jong, Lederer, Obhlidal, Poletti'.

Posä Volapük pirevidon, cifef Volapükanefta ästeifon ad kobükön kadämanis e dönulifükön Volapükakadämi (bo kanoy nemön oni kadämi kilid). Ün prim steifas et Volapükakadäm äbinädon me limans sököl:

Karl Ludwig (*Lösterän*), † 1943
J. G. M. Reynders, Sr. (*Nedän*), † 1963
A. A. Moll van Santbergen (*Nedän*), † 1938
Ştefan Basilescu (*Rumän*), † 1953
Arie de Jong (*Nedän*), † 1957
Albert Sleumer (*Deutän*) (*cifal ä dilekan*), † 1964
Jakob Sprenger (*Jveizän*), † 1951

Poso hiels 'Johann Schmidt' († 1977) (*Deutän*) e 'Filippus Johann Krüger' († 1992) (*Nedän*) ävedoms kadämans.

Dü yels mödik tumyela teldegid stad bisarik äbleibon dulön: kadämans Volapüka fe ädabinoms (samo hiels 'F. J. Krüger', 'B. R. Bishop', 'Jean-Claude Caraco'), ab kadäm Volapüka no äjäfidon as nogan calöfik. Ad vitön mistadi somik, kadäm Volapüka pädönu-noganükon ma dalebüd cifala velid: 'Brian Bishop' ün yel: 2007. Tüi tobul yela: 2007 kadäm at (ba kanoy nemön oni kadämi folid) äbinädon me limans sököl:

Brian R. Bishop (*cifal ettimik, nu stimacifal*)
Donald Gasper (*vicifal ettimik*)
Ralph Midgley (*guvan ettimik, nu stimakadämal*)
Jean-Claude Caraco, † 2015
Sérgio Meira (*nu stimakadäman*)

Kadäm at jünü jäfidon. Nutimo binädon me limans sököl:

1. Brian Bishop (*Linglän*): stimacifal sis yel: 2015
2. Donald Gasper (*Honkeän*): kadäman sis yel: 2006
3. Michael Everson (*Lireyän*): kadäman sis yel: 2012
4. Arden R. Smith (*Lamerikän*): kadäman sis yel: 2012
5. Hermann Philipps (*Deutän*): kadäman sis yel: 2012, cifal ä dilekan sis yel: 2014
6. Daniil Morozov (*Rusän*): kadäman ä vicifal sis yel: 2015
7. Igor Wasilewski (*Yapän, motedöp binon Polän*): kadäman sis yel: 2015
8. Zhang Yutong (*Tsyinän*): kadäman sis ayel.

Ba daloy lecedön kadämi nutimik geriani (medü cifals e pösods votik) kadäma balid e däti: gustul, 9 < zäladel, kel tefon kadämi cifamü cifal jölid. ■

Kis jenon-la, ven belegivoy eki süpädo (2)

fa 'Fritz Reuter', ini Volapük petradutöl fa kadäman: 'Igor Wasilewski'

Äspikotoms dö utos, viomodo äkösömay ad bitön tö 'Gustrow' tefü vestig lefilikvänianas, e tö 'Parchim' tefü komip vütorik*.

E viosuvo süts ömutons pasvipön, e viomodo cifodanef vemo lobabik öuton vügolön vü atos.

Söl: konsälal 'Darius' pö bespikam et ye vemo äpluom tefü lüblod okik, bi as 'Supernumerarius' nog älabom tikamagotis jönik mödik, kels ye pö konsälal: 'Zarnikow' demü mesedam alyelik pianiko iläsikons.

Ven valikosi at ibespikoms pro ben stükazifa: 'Güstrow' e stükazifa provinik: 'Parchim', ägoloms lü bed ed äjuitoms slipi gidanas.

"Obo," ziom obik: 'Matthies' äsagom kratölo kapi okik, äsva ästebedom, das tikets nulik ösüikons in ot, "dido mutoy säkön, kikodo – ibä sifals alyelo jenükons kobikamis tefü pold e lefilapold – no i söls konsälals labomsös-li kobikami oksik tefü lefilikväniäns e komips vütorik, klüliko frädü zifs? Ibä binos jenöfot: sisä söls obsik pato äbespikoms dinädi at, lefilikväniäns tö 'Güstrow' e 'Parchim' ai pavestigons bü lefilikam, e frut rajana at binon ga klülabik."


Klu söl: konsälal 'Darius' ävegom lü 'Rostock' e pos dels lul u mäls ägekömom labölo pödo in bökavab okik bogi gretik. Eküpölo oni lüblod oka äsäkom: "Kis binon-li in bog?"

Konsälali: 'Darius' ästegülön jöpiliäl okik, e stad oma di 'Supernumerarius' ägevon ome kuradi. Kluo ätikom: "Dunobös cogili", ed äsagom:

"Benö! fomälolöd: äkolkömob tö 'Rostock' jonani nimas natädik. Älabom i girafi, ed äjenos, das nim äpäridikon us. Ibä tidal löpajula obsik desinom ad fünön natädöpi pro jul okik, klu ätikob, das giraf somik öbinonöv prim gudik, ed äsevölo, das atos ögevonöv ome fred, ebli-bom bomemi e küiri."

"Süpäd kion obinos," ätikom ni-nälo, "ven nuläliko omaifükons le-bogi ad logön girafi, ed otuvons böki.

Ye söl: konsälal 'Zarnikow' e voms okik no änitädälons dö girafs.



* Ettimo tü del balid mayula äblinoy jikunis lü bälät kobo tors, kels sunädo äprimoms ad tatakön odis medü hons, jüs bal otas ävedon vikodaf. Täno püd ädareigon. Zifibelödans äkömons ad lelogön komipis at, e konsälalef ämuton mesülön pro jel etanas.

Ven tü göd fovik konsälal: 'Darius' imovegom e desino iglömom bogi, lüblod omik stepölo da vestibül äküpom bogi labü giraf, ed äsagom: "Godö! 'Darius' eglömom girafi okik!" Ed ävokädom lü jidünan: "Zigolöd e sukolöd mögodi ad sedön ati lü 'Parchim'!"

Mögod soik suno pätuvon e söl: konsälal 'Zarnekow' äsagom lü veigotan: "Pened no zesüdon. Glidolöd mödikna e sagolöd, das sedob me at girafi omik."

Veigotan in 'Parchim' ävabom foi yan söla konsälal, e ven äsäfledom bogi, goldan bäldik: 'Bohn' ästanom fo yan ed äsäkom:

"Kis binon-li in bog?" – "Giraf" äsagom veigotan.

Goldan: 'Bohn' äkonom osi yudane: 'Freudenthal', e yudan: 'Freudenthal' geinele: 'Staudy', e geinel: 'Staudy' bodele: 'Hilgendörp', e no düp bal äpasetikon, das zif lölik äsevon: "Konsälal: 'Darius' edagetom girafi".

Vütimo konsälal: 'Darius' ägekömom de konsälöp e, ven änügolom ini süt okik, el 'Jochen Hilgendörp' bäldik ästanom fo yan okik, ed äsagom: "Deli gudik, o söl konsälal! Giraf olik änu elükömon."

"Kis-li? Diabö!..." konsälal ätikom, e ven änilikom lü dom okik, el 'Bohn' bäldik äsagom: "O söl: konsälal! Ven uplödükol girafi dese bog, jonolös lenimi, begö!, id obe!"

Ven konsälal boso pijeikölo ärivom vestibüli – verato – us ästanon girafabog okik. "Fopan kiom! Lüblod obik!" äluvokädom.

"Ävilob kläno fredükön omi, ed om smilöfükom obi lo zif lölik! – Moukolöd bogi maleditik de dom obik."

Klu läd: konsälal 'Darius' äzi-säkof bevü tedans zifa, va al-seiman äsevom dö pöt ad sedön bos lü 'Güstrow' e 'Rostock' äsagölo, das änedof sedön lebogi semik lü 'Güstrow', e mödoti vinatubas vagik lü 'Rostock'.

Jidünan ofik suno ägekömof ed äsagof: "Glidis de söl: tedan 'Zichurius'! Veigotan: 'Snakenborg' ovegom odelo da 'Güstrow' lü 'Rostock', e läd: konsälal sedofös yegis, ed om oledunom vali."

Benö! atos pädunon, e tü göd balidkömö, ven veitotan äblümom ad movabön, tedan: 'Zichurius' äsagom: "Benö! e bog läda: konsälal-li...?"



"O si!" veigotan äsmilom, "bog labü giraf! Sevob! Sevob! Äspikotob ko läd: konsälal it! Dinäd drolük, o söl: 'Zichurius!'"

"Benö! klu sevol valikosi," äsagom tedan, e veigotan ämovabom. Äcogoy boso nämöfiko dö dinäd girafük konsälala, e jimatan löfik oma ämutof liedön mödo kodü fav omik. Ab pos dels kil u fols valikos pianiko päleodükon, ed ün poszedel semik läd: konsälal vemo koveniko äseadof ädrinölo kafü okik, ed äsagof lü ok it:

"Dani lemödük Gode, das dinäd maleditik fino epasetikon."

Tü timül et yan ämaifikon e penedihiblinan äblinom penedis tel; bal piladetöl lü söl: konsälal e telid lü läd: konsälal. Bofiks äkömons de 'Rostock'.

Läd: konsälal ämaifükof okiki, ab du reidam brads ofik ädofalons ve zekoap ofa, ed äluvokädo: "O Fat sülas! Kisi sinifon-li atos?"

Äreidof ed älaireidof, ab ai dönu otosi: viniselan: 'Ahlers' tö 'Rostock' ipenom ofe, das vinatubs gudiko ilükömons, ab i lebog, in kel ma sag bökana giraf päkipedon, ed äsäkom, kisi ösöton jenön tefü on.

Ebo ven ädäspärolo ägolof mo e ge in cem, ob älükömob: ziom olik 'Mathiess'. Ästanükof oki visü ob ed äsagof: "O ziom 'Matthies!'" – ibä ettimo ya alan änemon obi ziomi – "kis ejenon-lil! Kis ojenon-lil! Sevol-li, kiöpo nu giraf maleditik dabinon?" – "Tö 'Güstrow'" äsagob.

"Nö! tö 'Rostock!'" äsagof ed äkonof obe kuratiko jenoti lölik äläükölo, das üf himatan ofik ölilomöv dö jenot et, ba övutomöv so, das pro of no düp stilik bal öretonöv, e täno miserabiko ädrenof. Klüluko ämutob deflekön obi, bi smiläl äglepädön obi, ye suno kritaniko ätakedikob, e trodölo ofi äsagob: "Benö! zedolös osi, bi fino oklülükobs girafadinädi at. Odelo onedob golön lü 'Rostock' ed if vilol konfidön obi," äsagob, "okälälöb, das giraf maleditilik poblünönös kuratiko e stediko lü söl: konsälal 'Zarnekow', ven ogekömob de 'Güstrow'. Adelo binos tudel e tü fridel olabobs soari saludik. Klu lebog olükömon nog pötatimo."



Benö! atos ädönufredükon ofi, ed ädanof obi. Tü timül et änügolom söl: konsälal ed äsagom: "Soari gudik!". Ed ai änutülof obi, das leno ösagobös seimikosi, ägiovof ome penedi de 'Rostock'.

Äreidom penedi, e pos reidam äjedom oni faviko sui tab ed äsagom: "Lü diab tefü cödäd oba! Odelo omutob dönu vegön lü 'Rostock!'"

"Atos binon benöpötik," äsagob, "bi id ob nedob tävön usio. Kluo ovegobs kobo."

Fövot ofovon.

Klotem karasiuta (III)

fa ,Dazai Osamu', tradutod fa kadāman: ,Danny Zhang'

Fövot dilāda: II.

Enu ye isuemof pianiko, das e fom vataspila e vidot vatafala ai ācenons. Fino id isuemof, das vatafal no ābinon teiko vatafal ot, ab ya icenon ad lefog. Id ākanoy sevön osi dub fom veitik vataspilas, bundanik, kels pifomons dub nūfal de rufon vatafala donio.

Ün del at ,Suwa' nog āstanof jāfālōlo nilū vat. Äbinos lefogik, e viens fluküpiġ ālaibladons japōfiko ta cūgs redik jiela ,Suwa'. Äme-mof bosi pasetik – ün del semik fat ibradof ofi, logōlo kolatafurnodi, ed ikonon ofe somo:

Seimna ādabinons telādans: ,Saburō' e ,Hachirō', kels ābinoms bimifālans. Ün del semik, blod yunikum: ,Hachirō' āfanom trūitis anik ed āblinom onis domio. Blod bāldikum: ,Saburō' ye no nog igeġōmom de bel, klu ,Hachirō' būo ābakom bali pro ok it. Efidōlo oni, ācedom oni mu benosmekiki, klu tāno āfidom telidi, e kilidi – no āfāgom ad stopedōn, e fino ifidom valikis. Too sūpādo āsoafom vemo. Ärōnom lāi fonād, ed āfidrinom vati valik se on. Tāno ārōnom lāi blukil fo vilag, e dōnu āprimom ad drinōn. Drinōlo da koap omik sūpādo āsū-breikons skails. Ven ,Saburō' ālūġōmon poso, ,Hachirō' ya ivedom snek gianagretik, kel āšvimom in bluk. ,Saburō' āvokādom āl om: „O ,Hachirō'!” e snek gianagretik in bluk id āġesagom drenōlo: „O ,Saburō'!” Blod bāldikum āstanom su jol, e yunikum āšvimom in bluk. Ävokādoms drenōlo āl od: „O ,Hachirō'!” „O ,Saburō'!” ab nosi āka-noms dunōn.

Lilōlo konoti, ,Suwa' lūġik āsugof ko doats fata fulū kolatapūf, ed ādrenof nenropiko.

Gekōmōlo de mem pasetik, ,Suwa' dotiko ānutūlof me logalips okik. Vatafal go āvisipon! – „O ,Hachirō'!” „O ,Saburō'!” „O ,Hachirō'!”

Fat āstörūlom lianabledis redik su klifavöl, ed āpubons se ons.

„O ,Suwa'! Kisi eselol-li?”

No āġesagof. Äkluinof steifōlo nudi okik, kel ya iluimon ed ānidon dub vatatofs. Fat āleodūkom tiedōpi sagōlo nosi.

,Suwa' e fat āstörūlons bledis elas ,kumazasa*, ed ābegolons belavegi fagotū mets kiltum de kolatadomil.

„Ba binos-la gudikum ad sāregulōn tiedōpi.”

Fat āprimom ad polōn bāseti me nam nedetik, e flad sodadavata āfrakaton bosilo.

„Pos muhitadels nek oxānon sui lubel.”

Sol no nog löliġo imodonikon, ab in lubel āreton te ton vienas. Bleds sigik kvārepilas e firas āfalons sui ons, āšva āreinos sa nif.

„O fat!” ,Suwa’ ävokädof po fat okik: „Kikodo nog lifol-li?”

Fat dotiko ätovülom jotis okik, logedölo logodi fefik jiela ,Suwa’, ed ätisagom: „Igo ob it no sevob.”

Cuvölo ridabledi, ,Suwa’ äsagof:

„Täno binos-la gudikum ad deadön!”

Tovülölo namis okik, fat ävilom flapön ofi, ab äzogilom, e fino ädoseidom onis – ya ibüologom, das ,Suwa’ özunof. Ab cedölo, das ya ivedof jilepul, äsufädöm.

„No binos so! no binos so!”

Cedölo disipi fata vemo stupiki, ,Suwa’ äspukof bledi se mud, ed ämaleditof: „Stupan kiom! stupan kiom!”

Fövot ofovon.

* ,kumazasa’ – sot lövik bambuda: ,Sasa albo-marginata’.



Cogeds tel

fa kadäman: 'Daniil Morozof

Fat: Labob nunis badik. De omul mesed obik oläsikon.

Son: Atos sinifon-li, das oludrinol nemödikumo? o fatil!

Fat: Nö! o sonil! Atos sinifon, das ofidol nemödikumo.



Balan: Fägob ad mitulön meni alik me muf balik doata.

Votikan: Binol-li mastan di ‘karate’?

Balan: Nö! Binob fotografan.

Koräkot tefü gased gustula

Pad balid, fin setema balid:

... äcödetoym omi ... ad dead ..., ab leigüpo **äbenädöm omi** ad fanäbamapönod ... →

... äcödetoym omi ... ad dead ..., ab leigüpo **äceinoy deadacödeti** ad fanäbamapönod ...

Pök balid binon el -om in **äbenädöm**, pök telid binon sinif ba nepötöfik värba: **benädön**. Alo notodot: "**äceinoy deadacödeti ad ...**" binon kleilikum.

